



Inatsisartut Ilaqutariinnermut Peqqissutsimullu Ataatsimiititaliaanut

**Ilaqutariinnermut Peqqissutsimullu ataatsimiititaliamut allakkat - Inatsisissamik nalilersuinissamut qaaqqusinermiit apeqqutinut akissuteqaat.**

22. oktober 2015  
Sullap nr. 2015-116690  
All. Nr. 2044296

**1. Inatsisissatut siunnersuutimmi periaaserineqartut nassuiarneqarnerat.**

Ilaqutariinnermut Peqqissutsimullu Ataatsimiititaliap ataatsimeeqatiginerani inatsisissatut siunnersuutip inatsisilerinnermut tunngasortaasa misissorneqarneranni periaaserineqartut nassuiarneqarput.

Postboks 260  
3900 Nuuk  
Oqarasuaat (+299) 34 50 00  
All (+299) 34 66 66  
E-mail: [lian@nanoq.gl](mailto:lian@nanoq.gl)  
[www.naalakkersuisut.gl](http://www.naalakkersuisut.gl)

**2. Naligiissaarinnermut tunngatillugu ilanngaait**

Naalakkersuisut periarfissaq atorussuppaat maannakkut isertitat qanoq paasineqartarnerata erseqqissarneqarneranut. Maannakkut isertitat tassaapput qaammatit kingullit aqqaneq-marluk A- aamma B-mik isertitaasimasut aalajangersimasumik ilanngaait ilanngaatigereerlugu. Maannakkut isertitanit isertitat akileraarusigassaanngitsut tamarmik isiginiarneqarneq ajorput DIS aamma GIS isertitat eqqaassanngikkaanni.

**3. Inissiaq taassumalu aqqissugaanera**

a) Inissiaq taassumalu aqqissugaanera

Maannamut inatsit atuutsinneqarsimasoq malillugu ineqarnermut tapiissutit aningaasartassaat inissiami meeqqat amerlassusiat isertitallu akileraaruteqaataasussat tamarmiusut katinneri tunngavigalugit aalajangersarneqartarput.

Ineqarnermut tapiissutinik tunniussinissamut tunngavigineqartut inatsisissatut siunnersuut aqutugalugu oqaasertaliussamik "inissiaq taassumalu aqqissugaanera"-nik ilanearput. Tamatumalu kingorna tunngavigineqartoq Inatsisartut inatsisaanni piunasaqaait aalajangersarneqartut allat assigalugit ilanngunneqarluni. Tunngavigineqartussap nutaap atorneratigut "inissiaq taassumalu aqqissugaanera" nalunaarutikkut inissianut aalajangersimasunut ineqarnermut tapiissutinut aningaasanik qanoq annertutigisunik tapiissuteqartoqarnissaanut erseqqinnerusumik aalajangersaasoqarnissaa periarfissinneqassaaq.

Oqaasertaliussaq inissiaq taassumalu aqqissugaanera ilanngunneqarpoq attartortut ataasiakkaat apeqqutaatillugit ineqarnermut tapiissutit nikingassutaasa nalimmassarneqartarnissaat tunngavissikkumallugu. Ineqarnermut tapiissutinut maleruagassani iluanaarniarartoqarsinnaanerata killilersimaarnissaa pillugu naalakkersuinikkut kissaateqartoqarnera tunngavigalugu aalajangersagaq atornerqalerpoq, tassami peqqussut maanna atuuttoq malillugu tamatumunnga periarfissaqanngimmat.

Oqariaaseq inissiaq taassumalu aaqqissugaanera aqputigalugu ineqarnermut tapiissutit aningaasartaanni ineqarnermut tapiissutinik pisussap ilaqtatigut aningaasatigullu atugarisaata saniatigut ineqarnermut tapiissutinik pisussap attartugaa, attartukkallu aaqqissugaanera ilanngunneqartussaapput.

Ineqarnermut tapiissutinik tamakkiisunik tunineqassagaanni piumasaqaatit naammassineqarsimasussat inatsimmi § 8, imm. 2 naapertorlugu atuutsinneqalersumi nalunaarummi ersipput. Ineqarnermut tapiissummik annertussusiliinissamut nalunaarummi aalajangersarneqartut piumasaqaatit attartortitami naammassineqarsimanersut apeqquataatinneqassaaq. Ineqarnermut tapiissutit annerpaaffiannik tunineqarnissamut piumasaqaatit attartortitami naammassineqarsimassanngippata ineqarnermut tapiissutit aningaasartai annikinnerusut tunniunneqarsinnaassapput.

#### b) Inatsimmut ilanngussineq

Tamatuma saniatigut ilaqutariinnermut Peqqissutsimullu ataatsimiititaliap paaserusuppa iluarsissutip inatsimmut ilanngunnissaanut periarfissaqarnersoq.

Inatsisip oqaasertaani atuuttumi ineqarnermut tapiissummik annertussusiliinissamut pingaarutillit piumasaqaatit arlallit ilaapput. Inatsimmi piumasaqaatit arlallit tunngavigalugit nalunaarummi pissutsit arlaqartut maannamut iluarsineqareernikuupput.

Naalakkersuisut isumaqarput nalunaarut inatsisip oqaasertaanut ilanngutissallugu naleqqutinngitsoq. Piumasaqaatit attuumassutillit tamarmik Inatsisartut inatsisaanni ilaareerput. Inatsisip oqaasertaaniittut piumasaqaatit taakku kingunerisassaat nalunaarummi allassimapput allannguinnissamillu pisariaqartitsisoqarpat allaffissornikkut tamatuma pisinnaanera pingaaruteqarpoq.

#### **4. Malittarisassani atuuttuni iluanaarniarsinnaaneq.**

Piffissami sivitsortumi tamatumunnga tunngasoq sammineqangaatsiarsimavoq.

Ineqarnermut tapiissutinut aningaasartuutit pisortanit akilernerqartarmata inatsisikkut atuuttukkut inissiani attartortittakkani akit qaffasitsinnissaannut attartortitsisut periarfissaqarsimapput. Ineqarnermut tapiissuteqartarneq attartortitsisunut iluanaaruteqartitsisinnaasimavoq ineqarnermut tapiissut inatsisip anguniakkatut siunniussimasaatut - tassalu ineqarnermut akiluteqarnissamut aningaasatigut tapiiffiqineqartariaqartunut ikiorsiissutitut atorani.

Ineqarnermut tapiissuteqartarnermi malittarisassat atuuttut iluanaarniutigineqartarnerat unitsinniarlugu suliaq ukiuni arlaqalersuni ingerlanneqarsimavoq. Inatsisartut inatsisaanni allannguinnissaq pisariaqarsimavoq taamaalilluni ineqarnermut tapiissutip aningaasartai iluarsissuteqarnissamut tunngaviusut maannakkumut atuuttut saniatigut iluarsineqarsinnaanngorlugit.

#### **5. Ilinniagaqartunut kollegiani najugalinnut ineqarnermut tapiissutit.**

Ineqarnermut tapiissutinik tunineqarnissamut piumasaqaataavoq inigisaq ineqarneq pillugu inatsisartut peqqussutaanni pineqartunut ilaassasoq.

Ilisimatitsissutigineqarsinnaavoq ineqarnermut peqqussummi pineqartunut kollegiat ilaangimmata. Taamaattumik ineqarnermut peqqussut naapertorlugu aalajangersakkatut ineqarnermut akiliuteqartitsisoqarneq ajorpoq.

Tassunga taarsiullugu Aningaasanut Inatsimmi konto pingaarneq 40.02.01 oqaaseqaatit naapertorlugit akiliuteqartitsisoqartarpoq.

**6-8 Inatsisissatut siunnersuutip aningaasatigut kingunerisassaanik nassuiaaneq aamma ineqarnermut tapiissutinut aningaasaliissutit agguataarnerannik nassuiaaneq.**

Aningaasatigut kingunerisassat nassuiaataat aamma ineqarnermut tapiissutit makkununga tunniunneqartartut agguataarnerisa takussutissartaat ujjartorneqarput:

1. Namminersorlutik Oqartussat inissiat attartortittagaat
2. Kommunit inissiat attartortittagaat
3. Pisortat suliffeqarfiisa inissiat attartortittagaat
4. Namminersortut suliffeqarfiisa inissiat attartortittagaat
5. Namminersorlutik inissianik attartortitsisartut

Kalaallit Nunaanni naatsorsueqqissaartarfiup mailikkut 5. oktober 2015-imeersukkut akissutaa imaattoq Aningaasaqarnermut Naalackersuisoqarfiup tiguaa:

"Ini aamma Iserit kiisalu winformatikkimeersunik paasissutissanik pigisaqarpugut. Winformatikkip ineqarnermut tapiissuteqartarneq pillugu paasissutissiisarfiani tapiiffigineqartartut tamarmik takuneqarsinnaapput. Ini (kommuninut namminersorlutillu oqartussanut agguataarinissamik periarfissalinnut) aamma Iserit (Sermersuup kommunia) inissianut pisortanit pigineqartunut atuuttoq. Ajoraluartumilli inissiat attartortittakkat inunnut ataasiakkaanut imaluunniit namminersortut suliffeqarfiisa inissiat attartortittagaannut agguarlugit avinneqarnissaannut periarfissaqarunangilaq. Ini-mit Iserit-millu ineqarnermut akiliutinit paasissutissat sulii suliarineqarallassapput. "

Tassa imaappoq Aningaasaqarnermut Naalackersuisoqarfiup kisitsisit pigisani tunngavigalugit qulaani taaneqartut pillugit eqqornerusumik naatsorsuusiorsinnaanngilai.

"Maannakkut isertitanut" nuussinerup sunniutissai Aningaasaqarnermut Naalackersuisoqarfiup naatsorsorpai - naatsorsuinermit tamatuma sunniutai 25,5 mio. kr.-iupput makku ilimagisat naatsorsuullugit:

- Paasissutissat Kalaallit Nunaanni Naatsorsueqqissaartarfiup paasissutissiisutai 2013-imit aallaaveqartut tunniunneqartussat.
- Inuit pisortanit ikiorsiissutisisartut immikkoortiterneqanngillat (maannakkut isertitat sunniuteqanngillat)
- Maannakkut isertitat naatsorsuinermit inoqutigiit isertitaattut Kalaallit Nunaanni Naatsorsueqqissaartarfiup paasissutissaataanit ilisimatitsissutigineqartutut nassuiarneqartarput - 10.000 \* inoqutigiinni inersimasut amerlassusaat.

Paasissutissani kukkunerit, pisortanit ikiorsiisarnermit kukkunerit il.il. aqqinniarlugit sunniutissaq missingersorlugu affaannanngortinneqarpoq taamaalilluni AI 2016-imut

sunniutissat 12,8 mio. kr.-it ilanngunneqarlutik. Sipaarutaasoq taanna  
Namminersorlutik Oqartussat aamma kommunit akornanni agguaasserlaaseq 60/40  
naapertorlugu agguameqassaaq.

  
Martha Lund Olsen